

Papel Unidade Ema Vulnerável (VPU) PNTL

Diskursu husi Sekretaria Estadu ba Promosaun Igualdade Sra. Idelta Maria Rodrigues

iha Seremonia Entrega Karetu husi UNFPA bá Unidade Ema Vulnerável (VPU)

Díli, 14 Abril 2008

S.E. Komandante Jerál PNTL, Sr. Inspetór Afónso de Jesus

S.E. Komisáriu UNPOL, Sr. Rodolfo Tor

Reprezentante UNFPA no Koordenadór Rezidente Interinu ONU, Dr. Hernando Agudelo

Distintu Reprezentante husi PNTL, UNPOL no Sosiedade Sivíl

Hau hakarak atu fó benvindu bá ita bo'ot sira hotu iha Kuartel Jerál Polísia nian iha lorokraik ida ne'e bá ita bo'ot sira nian partisipasaun iha seremonia entrega karetu husi UNFPA bá Unidade bá Ema Vulnerável (VPU) distritu Díli no hau kontente atu fahe hanoin ho liafuan rumá bá ita bo'ot sira iha okaziaun ne'e.

Unidade bá Ema Vulnerável (VPU)

Hau familiar tebes ho servisu bo'ot ne'ebé VPU sira halo no unidade ida ne'e ita hotu hatene ne'ebé hari'i iha tinan 2001. Ita mós hatene katak governu ho apoiu husi ajénsia ONU balun, inklui UNFPA, halo esforsu maka'as teb-tebes iha tinan barak nia laran atu hametin rede servisu ne'ebé iha tiha ona bá vítima/sobrevivente husi krime violénsia hanesan violénsia doméstika, asaltu seksual no abuzu hasoru labarik. VPU iha knaar importante iha rede servisu ida ne'e hodi refere cliente sira bá servisu médiку emerjénsia, investiga krime hirak ne'e hodi hato'o bá iha Prokuradoria Jerál.

Ho realidade ne'ebé ita iha ona, servisu rede báziku iha Timor-Leste ne'e buat bo'ot ida ne'ebé ita atinje ona. Servisu hirak ne'e establese husi "kraik bá to'o leten", ne'e tanba servisu maka'as no dedikasaun ema Timor-Leste oan lubun ida ne'ebé kompostu husi sira ne'ebé hoabilidade/kapasidade saúde profisional ne'ebé suficiente, akonselladór trauma nian, traballadór Sosiál, advogadu, liu-liu ofisiál polísia nian, ne'ebé hotu-hotu espesiálizadu iha área kuidadu bá mate-restu ka sobrevivente sira husi violénsia bazéia bá jéneru.

Hau so iha atensaun oituan kona-ba dezafíu bo'ot lojístiku ho tékniku ne'ebé VPU hasoru wainhira ninia ema simu telefone husi cliente sira, espesiálmente depois óras servisu nian. Sira tenke asegura katak cliente sira hetan lalais asisténsia emerjénsia apropiadu.

Hau hatene katak liu husi karetu ne'ebé fó bá unidade ida ne'e, parseiru referál sira seluk sei sente seguru liu hodi tranfere cliente husi ospítál bá sira nia uma, no mós akompaña sira bá iha tribunal. Liutan, sira mós sei sente seguru tanba iha prezensa eskoltu polísia ida.

Hau hakarak hato'o hau nia agradesimentu bá UNFPA hodi fó karetu ida ne'e, aumenta ekipamentu sira seluk ne'ebé fó tiha ona hanesan kamera digital ida ne'ebé VPU sei uza iha ninia investigasaun kona-ba krime violénsia bazéia bá jéneru. Hau hatene katak sasan hirak ne'e sei tulun VPU iha ninia servisu atu foti evidénsia ne'ebé importante hodi hetan susesu iha proseksusaun relasiona ho krime hirak ne'e.

Kódigu Penál no Esbosu Lei Violénsia Doméstika

Iha kontestu ne'ebé bo'ot, hau hatene tebes katak servisu VPU nian ho unidade polísia sira seluk, so bele sai efetivu liu, karik, enkuadramentu jurídiku iha laran ne'ebé operasionaliza adekuadamente apoiu ida ne'e.

Hau hakarak asegura fila fali ita bo'ot sira hotu oras ne'e dau-daun iha ne'e katak Sekretária Estadu Promosaun Igualdade hamutuk ho UNFPA haluan liu-tan família ONU nian hodi servisu maka'as tebes atu asegura promulgasaun lei adisionál ne'ebé sei falta iha lei hanesan Kódigu Kriminál, Lei Kontra Violénsia Doméstika, Protesaun bá Testamuñha no Protesaun bá Labarik.

Iha NASAUN ne'ebé deit, sistema jurídiku presiza komponente ida-idak hanesan Polísia, Prokuradoria ho Tribunal servisu hamutuk ho di'ak ho efetivamente atu nune'e bele atinje justísa. Karik servisu hamutuk ne'e la lao, entaun konfiansa públiku nian lakon bá sistema justísa formál. Nune'e vítima ho nia família sira hakarak hili mekanizmu justísa Tradisionál atu rezolve sira nia problema – maske ida involve kazu krime sériu hanesan asaltu seksual bá adultu ho labarik sira. Infelizmente, wainhira ida ne'e akontese, vítima la hetan justísa.

Hau la espera katak krime sériu envolve asaltu hasoru ema rezolve deit iha liur no laos iha tribunal. Lei hasoru Violénsia Doméstika ne'ebé sei aprova, hau espera sei pasa iha tinan 2008. Lei ne'e klasifika Violénsia Doméstika hanesan krime públiku ho prosekusaun ne'ebé hetan susesu waihira iha senténsa kondena autór bá prizaun, tuir provizaun ne'ebé relevante ho kódigu kriminál ne'ebé sei aprova. Nune'e mós polísia ho VPU partikularmente sei halao knar importante ida atu asegura krime hotu-hotu kona-ba violénsia bazéia bá jéneru hetan investigasaun no ida ne'ebé aplicável, hatutan bá Prokuradoria tuir lei ne'ebé vigora.

Servisu sei barak atu halo

Hau kontente no hatene katak servisu VPU nian ema públiku barak mak hatene iha Díli, hanesan hatudu husi número ne'ebé aumenta no relata bá iha unidade VPU. Hau hatene membru unidade ne'e regularmente hola parte iha konsensializaun VPU nian iha kampu deslokadu ho komunidade. Iha fulan ida-rua liu bá número ofisiál VPU nian partisipa iha treinamento iha Akademia PNTL nian kona-ba investigasaun Violénsia Bazéia bá Jéneru ho Krime Abuzu bá Labarik. **Maibé, dalan sei naruk atu lao bá.**

Ita hotu hatene katak violénsia bazéia bá jéneru maka problema bo'ot ida iha NASAUN ida ne'e nia laran iha nível sosiedade hotu-hotu.

Abuzu fíziku, seksual, psikolójiku no abuzu ekonómiku, inkluindu violénsia tanba barlake, abuzu bá labarik, asedu seksual (*pelecehan sex*) no intimidasaun iha servisu fatin no violénsia relacionada ho esploitasaun ne'ebé akontese iha ita nia família no komunidade loron-loron. VPU, espesiálmente iha distritu, hasoru limitasaun operasional barak, ne'ebé dezafía funzionamentu ne'ebé efetivu no situaun hanesan presiza atu hetan solusaun lalais no urgente.

Rezultadu peskiza ida husi relatóriu komisaun UNICEF nian hatudu katak, karik, VPU tenke hametin husi ofisiál feto ka mane ne'ebé hetan treinamento no apoiu ho rekursu tékniku ne'ebé di'ak ho

fasilidade. Públiku sei persebe katak sira sei iha forsa maka'as iha investigasaun. Hodí nune'e ofisiál sira sei simu númérú referál ne'ebé aumenta fulan-fulan.

Hau konkorda ho rezultadu peskiza ida ne'e no fó apoiu bá rekomendasauñ atu dezenvolve no implementa planu implementasaun bá tempu naruk atu aumenta kapasidade no fasilidade VPU nian, ne'ebé sei jere husi UNPOL no PNTL. Karik ita preparadu atu diretamente hasoru dizafíu ne'ebé iha ne'ebé unidade hasoru, nune'e ita foti pasu importante primeiru atu asegura protesaun bá mane, feto no labarik husi violasaun bazéia bá jéneru oin-oin no mós kontribui bá atinje justísa bá hotu-hotu.

Hau kongratula imi hotu kona-ba esforsu to'o ohin loron no hau nia susesu bá ita bo'ot sira nia servisu iha futuru.

Obrigada.